



CCCXCIX. Nec occupantur res *nunquam de-relictæ*: uti bona naufragorum; *res amissæ* ve-luti e rheda cadentes, vel *fugitivæ*, si cognosci possint; nec res inexhausti usus, & quæ non possunt custodiri vel apprehendi, ut sol, ma-re, aer; cessant enim hisce in rebus tam pos-sessio, quam reliquæ dominii causæ, & hinc in communione primæva permanserunt. *Vir-gil. En. VII. v. 229.*

CAPUT XIV.

De effectibus dominii, seu de juribus & obligationibus, quæ ex dominio nascuntur, & accessione.

CCCC. Habet dominus jus disponendi de ipsius rei substantia & consectariis. Igitur ge-neralis dominii effectus est, ut eidem vi liber-tatis naturalis etiam jus competit ad omnes actus in re sua possibiles; & ut quilibet homo obligetur, ne dominum in horum jurium exercitio turbet, ac laesionem factam refaciat.

CCCCI. Hinc vero specialia domini jura de-rivantur, I. ut rem suam possit possidere, II. omne ex illa percipere emolumentum, vel etiam III. sese possessione aut dominio, sive toto, sive pro parte abdicare; quare quisque dicitur rei suæ moderator & arbiter.

CCCCII.



CCCCII. Ex facultate possessionis jus consequitur quoscumque alios a re sua excludendi, & cunctis omni actu circa eandem interdicendi; potest porro dominus illam tueri, amissamque ab omni detentore repetere, & probato dominio vindicare.

CCCCIII. Vi juris, quod habet ad omne emolumenntum, licet domino re sua non modo *uti*, hoc est, id, quod poscit necessitas, percipere, sed & *frui*, nimirum quidquid ex illa provenit, ad utilitatem & jucunditatem suam convertere, tum *meliorare*, immo in aliam plane formam transferre, *specificare*.

CCCCIV. Ex eo denique, quod domino sit jus disponendi pro arbitrio, sequitur, ut is possit rei dominium in alios transferre, *dare*, vel totum vel partem tantum; sive ea pars fuerit jus in solam substantiam, *proprietas*, *dominium directum*, sive jus in omnia consectaria, *dominium utile*; sive jus, vi cuius dominus aliquid in re sua pati vel non facere teneatur, *servitus*, veluti *ius usus*, aut *ius usus fructus*; quarum altera jus est re aliena utendi, altera jus etiam fruendi *salva substantia*.

CCCCV. Quid! quod vi justitiae stricte talis in foro externo etiam rem suam destruere, corrumpere, perdere & ea abuti cuique licet, modo id nemini noceat, quamquam res dilapidare & jactare officiis tam erga alios imperfectis, quam erga se ipsum repugnet.
v. L. 2. D. si a par. quis manum.



CCCCVI. Quum nemo in jure suo tam connato , quam hypothetico sit lădendus , & lăsio facta resarcienda , patet , *Furtum* , quod est fraudulenta rei alienæ ablatio invito domino animo sibi habendi , & *Rapinam* , quæ est furtnm violentum , *Invasionem* , quæ est factum , quo quis possessione rei suæ immobilis dejicitur , omnem denique defraudationem & damnum dolo vel culpa illatum lege naturali prohiberi ; atque auctorem mali ex hujusmodi factis orti ad restitutionem vel satisfactionem obligari .

CCCCVII. Rem autem alienam casu ad nos pervenientem esse restituendam , aut a tertio occultatam domino manifestandam , inde colligitur , quod , qui fecus ageret , is caussa esset , ut dominus rei suæ jacturam patiatur ; quod quum sit lădere , in aperto est , quemlibet ad rei alienæ restitutionem aciendam , vel silentio non impediendam obligari , quia reticentia hujusmodi involveret lădendi animum .

CCCCVIII. Si damnum casu infertur , nemini illud potest imputari ; igitur hic casus domino tantum nocebit . Hinc autem , si animal absque domini culpa rem alterius destruit , quoniam hoc damnum casuale est , efficitur , ut etiam id rei domino noceat ; nec dominus animalis aut damnum resarcire , aut animal , quod nocuit , extradere teneatur , sed in pari caussâ melior sit possessoris conditio .

CCCCIX.



CCCCIX. Quoniam in collisione officia erga se ipsum necessitatis officiis erga alios commoditatis præferenda sunt, nec jus con natum ad res necessarias introductione dominiorum cuiquam adimi potuit, quippe quod ex obligatione immutabili se conservandi ortum est, sequitur, ut, si quis cum extre ma necessitate luctetur, nec ulla alia pateat evadendi via, domino etiam invito eadem necessitate non laboranti res auferre, dete riorare, perdere jure possit.

CCCCX. Inde patet licere res alienas in mare projicere ad levandam navim, orto incendio ædificium vicini dissipare, arma ad defensionem alteri eripere, & quæ ejus sunt generis.

CCCCXI. Quamprimum tamen rei ablatæ restitutio fieri poterit, ea facienda est. Jus enim ad illam solum ex necessitate ortum est; ergo non nisi ex necessitate accipit mensuram. Quare si sufficiat usus, non datur jus in substantiam, & si substantia pro tempore opus sit, ea vel ejus æquivalens non poterit per petuo, & necessitate cessante retineri, alias hæc ipsa ulterior retentio dominum læsione adficeret.

CCCCXII. Incrementum, quod adquirit res in dominio alicujus existens, vocatur *Accessio*, & si fiat naturæ beneficio, *naturalis*, si factio hominis, *industrialis*, si utroque modo simul, *mixta*. Sunt vero accessionis *naturalis*



hæ species, 1.) *fætura*, hoc est fructus animalium, ut agni ovium, 2.) *alluvio*, quum agro particulæ terræ sensim & pedetentim adjiciuntur, 3.) *vis fluminis* seu incrementum simul & semel adjectum, 4.) *insula* in fluvio nata, 5.) *alvei mutatio*.

CCCCXIII. Duæ autem sunt accessionis naturalis regulæ: una, ut incrementum rei nostræ, quod ex eadem provenit, nostrum sit; quare insula, & alveus derelictus ejus est, cuius fluvius, & quod nascitur ex animalibus, ad dominum ventris statim pertinet. Altera, ut si incrementum veniat aliunde, & certæ sit *originis*, priori domino restituatur, veluti in vi fluminis; si vero id sit *incertæ originis*, sicut in alluvione, dominus rei principalis præcipuum jus habeat accessionem occupandi.

CCCCXIV. Accessionis industrialis species sunt I.) *adjunctio*, quæ fit α) *inclusione gemmæ*, β) *intextura purpuræ*, γ) *ædificio*, δ) *adferruminatione*, ε) *adplumbatura*, ζ) *pictura*, η) *scriptura*, tum II.) *confusio rerum liquidarum*, & *commixtio rerum aridarum*, & III.) *specificatio*, si v. c. ex argento quis faciat vasæ, vel vinum exprimat ex uvis.

CCCCXV. Doctrina accessionis industrialis dupli quoque regula continetur; prima est, si rei meæ novum aliquid accedat, quod alienum non est, erit meum, v. c. si pingam in mea tabula. Secunda, si accessorium fuerit alienum, vel potest separari, & restitui debet

bet priori domino, vel separari nequit, & res erit *pro rata communis*. Ita tamen, ut qui communionis auctor est, is alteri omne damnum debeat resarcire; si autem nemini communionio imputari possit, tunc vel voluntate utriusque, vel sorte sit decidendum, quinam retineat rem, & alteri per æquipollens satisfaciat.

CCCCXVI. Species demum accessionis mixtæ sunt *satio*, atque *in plantatio*, in quibus eædem sunt tenendæ regulæ, quæ in industriali accessione. Igitur illud axioma: *accessorium sequitur principale*, omni in sensu verum non est; sed solum ea in specie, quando rei meæ aliquid fit *accessorium*, *quod aquirere volo*, & possum *physice atque moraliter*. Tunc enim accessio modus est dominium adquirendi, & quidem secundum *quid originarius*.

C A P U T X V .

De Pactis.

CCCCXVII. Qui alteri declarat suam voluntatem rei alicujus præstandæ, hoc est, aliquid dandi, faciendi, vel non faciendi, promittit, qui vero declarat voluntatem rem sibi promissam in τῷ *suum recipiendi*, ille acceptat seu *stipulatur*. Promissio acceptata *pactum* dicitur; ergo in pacto adest *consensus* seu identitas duarum voluntatum in idem.